

الهيئة العامة لقصور الثقافة  
إقليم القناة وسيناء الثقافي  
فرع ثقافة الإسماعيلية

هذا الزمان في حوزة  
فقد رافقنا الخزانة  
عراقهم وبغزاة  
معهم في حوزة  
والخزانة في حوزة

## سابحه في عروقي

فوق  
خامس

٦٢٣٦٤٢٥٨  
أشعار بالعامية المصرية  
فاوي الشريف  
٢٠٠٢ / ١١ / ٢٠٠٢

رئيس مجلس الإدارة

محمد نجيب مبروك

مدير الثقافة العامة

محمد عبد الرحيم

رئيس التحرير

عبد الحميد البسيوني

مدير التحرير

عبد المصري

سكرتير التحرير

نشأت نجيب

## سماح ياليل

الخشوف إنذار ٠٠ في طياته الغضب

مين اشتكنا للقمر ٠٠

إلّاك يا ليل

باين عليك ٠٠ لسّاك حزين

لاجل قلنا إنك ضلام ٠٠

دمك ثقيل

نتمنى فيك يطلع نهار

ونتوه حيارى في الزحام

وندوق كاسات مر الحقيقة

نجري ما نجني غير سراب

في الطريق السهل حتى ٠٠

نندهس ارواح بريئة

تحت طيشنا وارتباكنا

غلطانين ٠٠ حقك علينا

ابتلىنا .. بطول لسان  
كم - يا ليل - ما انت جميل  
يا ابو النجوم القناديل  
ضاحكة كما عيون العذارى  
وقلوبنا - يا ليل - السهارى ..  
بتناجي فيك ود الأحبة ..  
وبتغزل الأحلام لبكرة  
تقرب مسافاتنا البعيدة ..  
والعنيدة  
تبقى ليلتك ألف ليلة  
نبقى عليه  
لمة سائرة للضفاف  
م الضفاف نركب مراكب  
والمواكب والزينات ..  
والرايات واصلة الوريد  
بيننا وبين مليون شهيد  
والنشيد عزف الحناجر  
المهاجر عاد لأرضه ..

حضن ضّمه من جديد  
أه يا ليل ٠٠ يابو المشاعر  
ده خيال أعظمها شاعر ٠٠  
فيك بيسرح للمدى  
يم الندى ورقص السنابل ع العيدان  
والغيطان فوق ضهرها سابلة القمر  
يم يم ف صفحته يطول السفر  
يم السما الحضن الوسيع  
كل شئ جّواك بديع  
يبهر الشاعر ويسطر  
يبتدي الموالم - يا ليل -  
ننتشي نغني يا ريتك  
- أه يا ليل - لو فينا تطول  
نسهرك ورفاقه نمرح  
والنجوم ترقص معانا  
والقمر مرسال هوانا  
والنسيم يرقى لقانا  
- أه يا ليل - يابو البراح

منك بنتمنى السماح  
للي قالوا الليل ضلام ..  
ده أنت الأمانى والأمان ..  
للي قضي نهاره عابد ..  
للي قدام العواصف عزمه ثابت  
إنت الهدوء .. إنت السكينة  
وقلوبنا ما بتحمل ضغينة  
لك ده بس من العشم  
قوم صالحنا بيتسم تاني القمر  
ما تقوم - يا ليل -  
ده اللي بيسامح كريم

## أغنية شهيد

---

في عيدك عليكي م السما طلبيت  
يا سينا يا اللي منك لجنتي اتزفيت  
لقيت أرضك بقت جنة  
وفيروزك دهب وياقوت

\*\*\*

لقيت النيل بكفوفه بيرويكى  
وشفت الليل بمبخرته بيرقيكي ..  
من الأنظار بقيت مزار  
ومبارك حالف تاني يعليكي

\*\*\*

أنا اللي كنت ع القنال واقف  
من بعد يونيه ولواجبي أنا عارف  
ولما نودي للكفاح لبيت  
في رمضان وشوقي ليكي كان جارف

\*\*\*

شُدَيْتْ عَزَمِي عَلَى ضَهْر الْقَتَالِ كَوْبَرِي  
عَدَيْتْ وَرَمَيْتْ بَارْلَيْفَ الْهَشِّ وَرَا ضَهْرِي  
وَجَرَيْتْ عَلَى أَرْضِكَ كَمَا الطُّوفَانُ  
فَوْقَ قَمَمِ الْجِبَالِ بِرُكَانِ هَدَرِ غَضْبِي

\*\*\*

وَكَانَ قَدْرِي مُسْتَنْتِي شَطِيئَةً صَابَتْتِي  
رَمَيْتْ نَفْسِي عَلَى أَرْضِكَ بِحَنِيئَةٍ ضَمْتْتِي  
غَسَلْتَ رِمَالَكَ يَا سَيْنَا أَنَا بَدْمِي  
وَطَلْتَ جِبَالَكَ وَفَ خَدِي بِاسْتَنْتِي

\*\*\*

ضَحَيْتْ بِرُوحِي يَا سَيْنَا فِدَا أَرْضِكَ  
حَرَرْتَ غَرْبِكَ وَطَلَيْتْ عَلَى شَرْقِكَ  
لَقَيْتْ طَابَا مَتَحَرَّرَةً وَبَتَغْنِي . .  
عَشْتِي يَا مِصْرَ وَعَاشَ لَنَا جَنْدُكَ

\*\*\*



## مرت سنة يا سوسنة

( إهداء إلى روح / هالة أحمد أبو زيد )

---

دمعتي لساها نازلة  
نار ما تهدا  
هزني يا صبر هزة  
يمكن انسى  
مهجة القلب المسافرة  
أه يا صبر .. انا عمري ما انسى  
هالة فينا .. لسه عايشة  
بسمة .. رسمة  
سيرة .. نتنسم عبيرها  
فين ما رحنا  
لكننا .. مرت سنة ..  
ولسه بنحلم كلنا ..  
قال يوم نشوف السوسنة ..

بين الزهور  
ننده يا هالة ..  
كل ما نشوف أي سرب ..  
من الطيور  
يرجع صدى صوتنا ..  
يا هالة يضمننا ..  
وبيكي معانا  
عصفور أخضر .. في السما ..  
يرفرف علينا  
هالة هناك .. عند الحنين ربنا  
نرفع كفوفنا للسما  
ونقول يا رب .. إنت الغفور  
الطف بنا  
إغفر لها .. وإغفر لنا  
وافتح لها باب جنتك

## قلبي وصبار الأمل

---

- ١ -

يا قلبي يا مغلبنني فيك ٠٠  
لساك بتعلم باللي غاب  
ولا جانا يوم عنه خبر ٠  
ولا له أثر  
وانت وانا ٠٠  
عاشين على ضي الأمل  
إفرد جناحاتك وطير  
يمكن يكون فوق ٠٠ ع القمر  
وهناك أسير  
يمكن يكون ٠٠  
غرقان في بحر من العسل

يا أمل جواي مندي ٠٠  
لولاك لمليت الانتظار  
يوماتي بنفوت ع الديار  
لاجل نتسم عبيره  
م البعد نتملا خياله  
باضغط على قلبي ليفضحني وينده ٠٠  
أو يشاور  
نفكر أيام زمان  
تبكي أشواقنا الفراق  
وتواسينا الشبابيك  
تعصر الصبار ٠٠ ونشربه من إيديك

## اليمام ع النخل غنى

ياللي مالي قلبي حبيك  
مالي غيرك ثاني ليلي  
لو هافكر يوم في غيرك  
تبقى ذاتك إنت ليلي  
هل أنا يا ليلي قيسك ؟  
لو كنتي متقوليه لا ٠٠  
لا متقوليش  
خليني أعيش أحلم ببيكره  
لما تبقى تقولي أيوه ٠٠  
تبقى منك أحلى غنوة  
أنشدك في كل مطرح  
أنا قيس بن الملوح  
أه يا ليلي حبي ليكي ما ينتهيش  
أنا قيس جُبت الصحاري  
أشعرك ليلي نهاري

أرصدك بين الخيام  
اليمام ع النخل غنى  
قيس يا ليلي لا ينام  
كيف ينام ونيرانه والعه  
بتكوي قلبه بالهيام  
كيف ينام وعيونه دامعه  
من بعادك ع الدوام  
آه يا ليلي حبي ليكي ما ينتهش  
فاكرة أول نظرة منك  
سهم صابني خلى قلبي  
كل دقائقه غرام  
إنزعي من قلبي سهمك  
تلتقي في الدم عطرك  
ضمدي الجرح المتيم  
أوصليه شريان مودة  
قلبي واصله من زمان  
بثي فيه شوق المحبة بانتظام  
خوفي يا ليلي تنتهي . .

أو تضيعي في الزحام  
ليلي طيفك لو يجيني فـ عز ليلي . .  
بتكوني لي شمس طالعة  
أجري فيكي ناري والعة  
أحضنك فوق السحاب . .  
وأغني فيكي عيون جريئة  
والعذاب بعدك حقيقة  
والحقيقة تبقى مرة  
لو تكونيها سراب  
لو كنتي هتقولها أيوه  
أخطفك وسط البراري  
أزرعك بستان قراري  
تفيض بنابيع قلبي نهره  
أروي فيكي العمر كله  
يغني قلبي ليلي أحلى . .  
أحلى من ذات الجمال  
الدلال فيكي تجسد

وتيسم لي مرسى  
آه يا ليلي - طفي ناري لو بهمسه  
أحضنك فوق الشجر  
أغمرك أنا بالقبل  
م الضحى لما السحر  
والقمر ويانا يرقص  
والنجوم والليل تهيص  
الأدان بالفجر بشر  
أحملك درعي وسيفي وآه يا خوفي  
ماكونش قيسك  
ينتحر قلبي اللي غنى له اليمام



## مين فينا أصدق

---

مين فينا أصدق .. ياللي كنت أنا يوم حبيبك  
جايني ليه تشكي همومك .. بعد إيه تذرف دموعك  
جاي تقول الحب كان .. كان زمان .. أيوه كان  
صافي وكان ينبوع حنان .. صادق وكان مركب أمان  
النهاردة الحب كلمة .. بدون معاني  
أي قلب يدق ليه .. يفضل يعاني  
من حبيب فاكده حبيبه .. غايبة عنه احساساته  
انغر فيه وتاه طريقه .. لأجل حبه لنزواته  
جايني تبكي بعد إيه .. سبت قلبي لمين ولية  
أما أنا .. ماشي فـ طريقتي فيه بدور عن حبيبي  
اللي تايه من زمان .. هو إنت يا حبيبي  
قلبي لسه رايدك انت .. اللي غايب ودك انت  
إنت حبي وكل عشقي .. نبض قلبي لك حنان  
إنت لحن وغموة حلوة .. فوق شفايفي ع الدوام  
إنت جرح فـ قلبي لسه .. من سهام أول غرام

إن ألمني ٠٠ أحس اني ٠٠ باعيش عذابه فـ انسجام  
جايني عايز مني ايه ٠٠ روح لغيري إشكي ليه  
دوق مرار الغدر زبي ٠٠ عيش عذاب الهجر بعدي  
خنت عهدي ٠٠ وبعثت ودك ٠٠ للي شاري يوم ما حبك  
غبت عني ٠٠ وضعت مني ٠٠  
جايني تشكي من اللي بعدي صار حبيبك ٠٠ يا خسارة .  
فين هدوء تحت الشجر ٠٠ والمسير ساعة العصري  
الشجر ضله خطر ٠٠ الطريق كله ضواري  
فين وفاءك اللي كان ٠٠ ناير طريقك ؟  
فين حنانك اللي كان ٠٠ زرين جبينك ؟  
فين غرامك اللي كان سحره فخدودك ٠٠  
فينك انت بتاع زمان ؟  
مين فينا أصدق ٠٠ يا حبيب اليوم وبكرة ٠٠ وحب كان  
لما أقول لك ٠٠ لسه فيه هنا حب صادق - وف قلبي نابض  
اللي بين شطرينه عايش ٠٠ أنت وحدك من زمان  
يبقى أنا هو اللي أصدق ٠٠ أيوه أصدق على الدوام

## عيون أميرة

---

يا أميرة .. عيونك دي حكاية  
وبداية عشقي وغمامي  
من نظرة رمتني في التوهة  
والثانية .. خدنتني لأحلامي  
والثالثة .. تحدي لمشاعري  
لو شاطر تقدر تتساني  
أنساها .. أبدا ما أنساها  
باتمنى التوهة في بحورها  
والموج يحدفني لجواها  
والحلم ياخذني لجزيرة  
يا أميرة ما افوق ولا أصحاشي  
إلا وتكوني على حصاني  
فارس أحلامك وابهرها  
زي ماهي عيونك ساحراني

\*\*\*

واخذاني عيونك يا أميرة  
يمكن لسماكي أو أبعد  
كيف أبعد عنها وبالقاضي  
قمرى اللي منور لى حياتى  
ونجوم دى رموشك بتلالي  
والنيزك منها بيشطرنى  
تجمعنى تانى كحلته

\*\*\*

دى عيونك دايمًا ضحاكية  
يا أميرة بترقص جوايا  
بتغنى باحبك واغنى  
يا أميرة عيونك دى حكاية  
وبداية عشقى وغرامى  
ونهاية ياسى وأساي

\*\*\*

كان بودي ٠٠ إنني اكتب  
عن عيونك ٠٠ يوم قصيدة  
كل ماجي أبتديها ٠٠  
بتصادفني حاجات غريبة  
بالتقي عيونك قريبة  
والحروف عني بعيدة  
أنده عليها ٠٠ أشدها  
أبني كلمة ٠٠ أهدها  
تضحك عيونك ٠٠ وتشاورلي  
لا يا شاعر ٠٠ مش هتقدر  
ما في كلمة بتشابهني  
والطريق للنني واعر  
أي عابر فيه بيهلك  
تبعد عيونك ٠٠ ثاني تقرب  
تبعد وتقرب

أمسكها ٠٠ تهرب  
كيف راح اكتب ٠٠  
- أه يا حلوة - أو أنا  
والرموش صفين عساكر  
ومصوبين يمي السهام  
يا سلام ٠٠  
نظرتك في القلب غنوة  
تسري في كل العروق  
ضوء ٠٠ يصحى لي المشاعر  
أبقى شاعر ٠٠  
إني واخذك للبعيد  
في الطريق ٠٠  
حبنا هو الرفيق  
هو زوادنا وزادنا  
فوق شط بحر الحب نرسا  
يا دوبها غمزة ٠٠ من عينيكي  
تجري واجري ٠٠ نضم ضمة  
ويداعبنا موج مروح ٠٠

للنهاية

واحنا لسه يا حبيبتي . .

في البداية

ننطرح فوق الرمال

نطرح عيونك فرحتك

تضحك في قلبي همستك

اللمسة مهي تدوبك . .

وندوب سوا

تسكرنا كاسات الهوى . .

ما نتوهش خالص

ترقص عواطفنا الجنون . .

ويا النوارس

رقصة الغزلان في لحظات الفتون . .

فوق ضهر مارس

ويعاندنا البحر يهدا

واحنا يا حلوة ما نهذا

رقصنا ع الشط يحمي

نظرتك غنوتها تعلا

والصدي يهز المدي  
والثقيني ألف فارس  
أمتطي أنا ضهر مارس  
تضحك عيونك وتصارحني  
لأ يا شاعر ٠٠ مش هاسلم ٠٠ لو هاسلم ٠٠  
تتكوي بنار الهيام  
والرموش صفيين جنود  
بيعيدوني للحدود  
مترشقة فقلبي السهام



## سماح اليمامة

{ إهداء إلى / سماح أحمد إسماعيل }

---

كيف بس أنا ٠٠ يوم هانسي إسمك  
لو سهيت ٠٠ هانساني أنا  
يا حبيبتني أنا ٠٠ ده حتى رسمك  
في فؤادي صار غنا  
يا سهام في القلب ٠٠ رشقت  
لما سمعك - ها هنا  
في القنطرة كنتي كبلبل  
كان حزين من كام سنة  
غرد شجانا والا بكانا  
لأبكي فينا جهالة  
معششة ف قلب الغنا  
ما هو أي حاجة نقول بنشعر ٠٠ والسلام  
والكلام من غير ما نشعر ٠٠ في انعدام  
يا سلام لما سمعتك  
كنتي كما ينبوع علام

أنا لما شفتك كنتي ورده  
وع الربابة بتشعرينا  
بتعلمينا الصدق في حروف كل كلمة بتشدني بيهها  
بلا دروشة .. أو هلوسة .. بترددتها  
كنتي فعلا .. زي أمك .. مصر ذاتها  
بتعلم ولادها الاحترام .. والأدب والاحتشام  
لما نظرتك .. والبراءة والجرأة محوطينك  
كنتي فعلا مصر أمك  
لما صبرت .. فجأة عبرت  
لاجل تاجي هنا تضمك ..  
لاجل ما عيونها تنام  
تسلم البطن اللي شالت  
يسلم الظهر اللي جابك  
يسلم اللي ف يوم دعاني  
لاجل أشوف كل الأمان  
في عيون وقلب القنطرة  
ويمامة بيضة معطرة  
من عطرها فج الصباح  
سألت قالوا : دي سماح

## الصدر العجيب

---

ولما الشمس بتروح  
بيطرح في البلاد الليل ..  
نسايم عطرها فواح  
براح في النفس ينعشني  
ويضوي ف جوفي ميت هالة  
تزيد في القلب أشواقي  
تغني في العيون لهفة  
حبيبتي زبي مشتاقة  
أشد الخطوة في طريقي  
ومعشوقتي على الجنين ..  
من الشبابيك بدور طالة  
في عمدان الضيا ضاحكة  
على حيطان الديار ناقصة ..  
أسامي كام كانت عاشقة  
وفي وسط الطريق أهة  
تنادينني للقيها

أسرع في الخطا طائر  
وأحاور نفسي ليه بالذات ؟ ٠٠  
حبيبتي في المكان ده هناك  
بتبهرني بروياها  
أمم رايحة وأمم جاية  
وصوت الضي يتجسم  
وشوش الخلق تتبسم  
حبيبتي في التاريخ راية  
عيون الدنيا باصة لها  
حبيبتي رموشها قتالة  
وأما عيونها قول زرقاة  
تقول خضرة ساعة روقان  
تصير سمرة في الأحزان  
وحمرة ضد أي جبان  
وشعرها موج يهددني  
وموج تأثير على الطغيان  
وأما دراعها ده مرمر

حنين لي وبتمده  
عدوي بقوة بتمده  
وكام باغي وكام عسكر  
حبيبتني في الجمال أية  
جمالها أصله ربّاني  
جمالها أصله ربّاني  
وعايش جوه وجداني  
وأما صدرها حكاية  
بيعلا لفوق بلا نهاية  
ماهيش أو هام  
حبيبتني من زمان باننية  
نهودها يا ناس أهرام

## أنا المفتون

---

أنا عاشق في محرابك ٠٠ باغني غناي  
وقلبك كان ٠٠ بيترنم معاي ع الناي  
ويعزف ع الكمان رمشك ٠٠ ويُسرنِي  
ويشطرني وتر عودك  
ويجمعني صهيل قلبي ٠٠  
لشدة شوقه للمرماح  
ودق الطبل في وداني ٠٠  
يهز هز كل وجداني  
أمد كفوفي لكفوفك  
يطير خوفي ٠٠ يطير خوفك  
وتتعانق مشاعرنا ٠٠  
وتتعاهد ما حد يسيب  
ومين هيسيب ؟ !! ٠٠  
ما دام الوجد جمعنا  
أبوس النسمة لو مرت ٠٠ على الخدين  
واداعب شعرك الهفهاف ٠٠

يواعدني على الشطين  
اشوفك سابعة في عروقي ..  
عروسة بحر .. بلطية  
ونبض القلب يرقكي  
وأسمع منك الالهة  
تاخذني لدنيا تواهة  
ما فيش أروع من النشوى .. وتتهيدة جمال فتان  
وهان الود .. تتسيني كده فجأة  
أنا مذهول .. في عز الليل .. أقول عبلة  
اشوف طيفك .. طيور هاجة .. وخيل جامحة  
وغزلان في الفلا شاردة  
أعيد النده بالعالى  
تعالى عيلتي واحدة ..  
تعالى ونسي الوحدة  
تعالى قلبي متحسر  
وأقصي ما بي مستنظر  
ما فيش عسكر .. ما نيش عنتر  
أنا شاعر بحالة حب فياضة

ضلوع الصدر تواقفة للحظة ضم  
وروحى هائمة لبعادك يتيمة الأم  
وأنور حوالى والقانى أسير حبك  
وأشكى لوحدي هجر  
وأهجرني أروح على فين ؟!  
شطوط وغيطان هتسألني ٠٠ أكيد عنك  
وحتى البحر خاصمني ٠٠ لاكون بعثك  
أنا ملاح يا مركبتي  
وبحر العشق برضه انتى  
وإنتي المرسى والمعنى  
وقولة عبلة كتر هيام  
وكام باحلم ٠٠ أكون عنتر  
أحارب كل من مسك ٠٠ وما يقدر يطول شعرة  
وأحارب كل من شافك ٠٠ ولا صلى على الهادي  
تعالى وحشني محرابك ٠٠  
ورمح الخيل في مضمارك  
دي دقة قلبي على بابك ٠٠ تملي نقول  
أنا الشاعر بحالة حب فياضة ٠٠ أنا المقتون



آه يا ناعسه ..  
يا ترى نعسانه والا .. زي مجافكي الرقاد  
ناسيانا والا .. في الغنا باكية البعاد  
ده أنا والقلب المتيم لسه بيكي والعيون ..  
بنقيد شموع ..  
دايما بتحكي لنا عليك بالدموع  
لحظة تشوفك كان ليلي ضيها .. ويبوس خدودك  
سحر نورك كان ببيهرها .. وتسكرها عطورك  
كانت من النشوى .. بتتمايل على حنة كفوفك  
فاكره لما كنا نتجمع ليلاتي .. جوه داركم  
كنت أدق الباب .. بقلبك تفتحي لي  
تحضنك أشواقي وأحضن فرحتك  
تسبقك رد التحية ابتسامتك;  
( يسعد مساك العمر كله يا حبيبي )  
أحلا كلمه .. لسه بيرددها قلبي

فاكره لما كنا نتقابل ونمرح .. وقت ما يفج الصباح  
وسط البراح .. اللي ما بين الساقيه والنخله الرطب  
كان صدري انا تكعييه وخدودك عناقيد العنب  
رغم الهيام والشوق .. كنت أخاف من قطفه موت  
كانوا بيقولوا حرام  
من صغرنا واحنا بنعرف معنى عيب  
أجري واقطف حلبة خضرة .. والا أكسر عود قصب  
أطفي نار الوجد فيّ  
كنت أشوفك من عيون القلب شجره  
طرحها رمان وطايب .. للجنية  
مشتهية كل نبضه ف قلبي لكن .. مستحبة  
فاكره خص البوص .. وتعريشته الحطب  
كنا نرتاح فيه بلهفة .. لما يملكننا التعب  
نبتدي نحلم بيكره  
نرسمه ع الخص يضوي كالذهب  
ينظره القمر يبغي يحوم حوالينا ف طرب  
أه يا ناعسة ..  
حبنا كان يضوي حتى .. النجع كله والخلا

أه م الزمان اللي غدر  
والا يمكن اتحسدنا ٠٠ والا كان مكتوب علينا نفترق  
وتعيش على الذكرى قلوبنا ومن بعدنا بتتحرق  
أه يا ناعسة ٠٠ ما علينا إلا نصبر  
ماهوش بعيد ٠٠ هيفج من ثاني الصباح ٠٠  
ويكون جامعنا للهوى  
والقلوب تخضر من ثاني وتطرح ٠٠ في الخلا مليون قمر \*

## انتظار السراب

---

فاكر حبيبك يا قمر  
فاكر وداعك والمطر  
لما انشطر قلبي أنا  
ويا العيون .. كان قلبي دامع  
بكى الفراق .. في المواجه  
ورجعت اغني  
صدقته لما .. قلت راجع  
ورجعت أغني  
وفضلت وحدي  
هيمن في بحر الذكريات  
وأقرأ الرسائل  
اللي كان .. ينقشها قلبك  
لساها باقيه حته منك  
فيها شذاك .. سابق نسيمك  
فيها لقاك .. ويا حنينك

أتوه في همسك  
ويا دوب أتوه  
يحضني رسمك  
أدوب وادوب  
وافوق في إسمك  
التقيتك لسه فـ غيابك

\*\*\*

واروي الخمايل  
اللي باحت للربيع ٠٠ عن سرنا  
لساها فاكرة ضحكتي ..  
وفرحتي الحلوة معاك  
أجمع لي صحبة ورد منها ٠٠ كل يوم  
تغنيني عن كل الصباح  
وأطل منها ع اللي غاب  
أنظر عينيك ٠٠ واندع عليك  
التقيتك لسه فـ غيابك

\*\*\*

آه م العذاب

لما بتدمع وردة منها  
أي دمة  
لحظة غروب الشمس مرة  
والليل بيطحن ٠٠ كل صبري والأمال  
ويرشها فوش الضباب

\*\*\*

آه م العذاب  
من يوم غيابك يا حبيبي  
الفرحة ما دقت لي باب

\*\*\*

مرت شهور  
ما سمعت منك أي كلمة أو رسالة  
والا استحالة ٠٠  
انك هترجع  
وانتظاري يكون سراب ؟؟؟

## رسمة البستان

---

الليل سنين فارد على أرض الوطن ضله  
أبو الهول مل وضجر زار صحنى جميع أهله  
أحمد عرابي ركب فرسه وصرخ في الليل  
مهما تطول ظلمتك طريق العزة ما نضله

\*\*\*

مدينة بتده من على شط القنال لنهار  
يكسر حروف الليل يشق فـ أرضها أنهار  
تروي بساتين الحرية ٠٠ تغني تقول يا ليل  
أنا حارسه مالي وقنالي بعزيمة ما تنهار

\*\*\*

الليل معاند جمع دبابته وشياطينه  
حلف ليدمر البستان وحراسه وزار عينه  
زعق الحرس أبعد يا ليل الضلمه م البستان  
اللي هيقرب منه هندبجه وندفنه ف طينه

عوت الديابه يا ولداه وهاجت الشياطين  
هبوا الجنائنية بالمناجل وبالسكاكين  
يشدوا أزر الحرس ما اهتزوا ولا كشوا  
صدوا الغزاة ونوروا بدماهم الميادين

\*\*\*

آدي الميدان وعرابي ورسمة تلبستان  
آدي عيون الشرطة سهرانة في كل مكان  
آدي البواسل اللي ليهم المدينة لسة بتغني  
أنا إسماعيلية وبالشرطة بأعيش في أمان

\*\*\*



## أنا ما زلت باتعجب

---

أنا اللي منه باتعجب

يا شاعر ٠٠ ياك بحور شعرك خلاص جفت  
وجوف جوفك صبح خويان  
من كلمة بتشجيني  
تهز كل وجداني  
تنسى القلب أحزانه ٠٠ يعيد موالك من الأول !!؟

وأنا ما زلت باتعجب

في دروب الغلابة مشيت ٠٠ إنت ذات نفسك  
ولكل جرح دويت ٠٠ والبلسم في غنوتك  
نسيت اليتيم يتمه  
ومسحت للحزين دمه  
والكل صار فرحان ٠٠ عاد موالك من الأول

## وأنا ما زلت باتعجب

رجعت مشيت ٠٠ في غير دربك  
ولما جريت ٠٠ نسيت صدقك  
هناك مالفيتش غير وهمك ٠٠  
وبين الحدة والغربان مافيش قمري  
وحتى اللون هناك باهت ٠٠ وعشقك كان بلون خمري  
ومين يا شاعر في دول ٠٠ هيعيد موالك من الأول

## وأنا ما زلت باتعجب

دا كان مطرك رذاذ ينزل  
على ضهر الصخور تخضر  
ويطرح في الفروع رمان  
سنابل القمح تتمايل ٠٠ مع الموال  
وعيدان القصب بتعيد ٠٠ مع السيسبان موالك من الأول

## وأنا مازلت باتعجب

وكان سيلك كما الرهوان  
يحب الرمح في الوديان  
ويتقسم بحور وبحور  
وتتطوح جبال الكون  
بيسكرها مزيج عطرك مع الموش ٠٠ وتعيده م الأول

## وأنا مازلت باتعجب

وفي بحور عشقك سوا عمنا  
أنا والقلب ومنا ٠٠ وموج يعلا وموج ينزل  
ويهدا الموج وما نهذا ٠٠ وتهدينا الطريق صورتك  
على حروف الكلام من ناي  
ويرقص كل جّواي ٠٠ وعيوني كما مراية ٠٠  
تعيد موالك من الأول

وأنا مازلت باتعجب

بنسبح في الخيال لبعيد .. بعيد خالص  
نلاقي بين الحروف العيد .. وصدقك الخالص  
ونبني الحلم فوق الحلم .. ونعلا لفوق .. لفوق خالص  
بنلناك ع القمر جالس  
ونجوم السما حواليك .. يعيد الكل موالك من الأول

وأنا مازلت باتعجب

نسيت حيفا .. نسيت يافا .. نسيت غزة  
نسيت اللمة والعزة  
وقلت الكلمة .. مسلوب الحيا منها  
بيصرخ جوه جواها .. بمعناها وفحواها  
وبتلاقي هناك سامعين

## يا شاعر ..

أنا بدي عليك أعتب  
لا هاسبح عمري في بركة .. ولا منها في يوم هاشرب  
دا بحرك عشقي .. بانهل منه .. فيه باعطس  
وينبوع الأدب ما يجف ولا ينقص  
في جوف اللي بيه شاعر .. وله مخلص

## لما يتسم الرغبة

---

يا مدينة .. من سنين لسه حزينه ..  
والرصيف لابس حداد  
والشوارع جوفها طالع ..  
كل يوم باكي اللي فات  
ده انت كنتي ..  
يا مدينتي ..  
في نشيد كل البلاد  
اللي قال عنك باريس  
واللي مهووس بالهاويس ..  
واللي ما مل الحديث ..  
( عن روعة الملاحة )  
واللي قالوا لا .. دي واحدة  
أو خميلة ..  
دي عروس مصر الجميلة  
أما شعبك كان حضاري

كان معاني للبطولة والبسالة  
كان دراعك ٠٠ كان دروعك  
قاد شموعك بالمحبة والوئام  
دب فيه ليه الخصام ؟!!  
والتواكل سوس بينخر في العظام  
بدل البسمة بكآبة  
حول الخضرة ليابس  
آه ٠٠ لمرتع للديابة  
العبير كان منها يسكر ٠٠  
كل زاير ٠٠ كل عابر  
كل عشاق الجمال  
يا مدينتي ٠٠  
يا شموخ لساه بيرفض الانتكسار  
قومي عيدي الماضي تاني  
هزي أوتار الأمانى  
فوق هدير السمسمة  
غني موالك هدية للعباد  
عمرى قلوبهم جهاد

أبدي النسمة العصري  
شاوري ميادينك تلاي  
رجعي أحلى الليالي  
ينتشى البدر المتيم بالسهر  
يرقص الفيروز وأوراق الشجر  
وتردد الشيطان غنانا  
والسفاين .. والنسايم  
كوني حلم لكل صاحي لكل نايم  
لملمي صغارك في حضنك  
قبل ما يصيروا وليمة للضياع  
هزهي غاوي الكراسي والتماسي ..  
واللي بيمارس مصالحه  
ودي يتصالحوا معانا  
يرموا حتى لو سلام  
ينسوا تزويق الكلام  
بكفياهم أسئلة  
حتى تبقى الأجوبة ..  
فعل بصحيح .. والإبتسامة .. ضيها فخد الرغبة



## فكها لاجل النبي

---

يا رب لطفك والسماح  
صار عرضنا ٠٠ صار دمنا  
صار كل شئ ٠٠ فينا مباح  
عم الفساد ٠٠ البغي زاد  
حلم الموساد  
صار في البلاد ٠٠ مليون مزاد

أول مزاد ٠٠  
أجمل عروض  
دوس ع الزيموت  
أطلق عنان ٠٠  
فرس الخيال  
وإن زاد هيام ٠٠ لملم صحاب  
أخطف وزوغ ٠٠

وسط الغيطان  
حظك يكون ..  
مهرة .. غزال ..  
او بنت اخوك  
ما هو كل شئ .. فينا مباح

تاني مزاد ..  
أصناف كثير  
من غير جناح ..  
في الكون تطير  
واللي ما جاش مايهمناش  
شمة ببلاش ..  
ياجي ع المداش  
ويبيع حياه  
لاجل الحياه ..  
يدبح أخاه ..  
أمه وأباه  
ما هو كل شئ .. فينا مباح

تالت مزاد ٠٠  
تقصيل هدم  
عند اللزوم ٠٠  
من غير قماش  
ننقش حروف ٠٠ أي لف ويو ٠٠  
فوق الصدور ٠٠  
أوع الكتاف  
تصرخ خصور  
ستات بنات  
باللي تطول ٠٠  
في الحضن بات  
ما هو كل شئ ٠٠ فينا مباح

رابع مزاد ٠٠  
دعوة مزاج  
عاملين حساب ٠٠  
حتى الآداب  
جاهزة الحبوب ٠٠ ويا النبييت

وان دبت دوب  
سمرة وبياض  
شقرة بنهود  
هادية ولعوب  
بنت الجيران  
أو بنت ابوك  
ماهو كل شئ ٠٠ فينا مباح

خامس مزاد ٠٠  
عاملاه طروب  
عبي الجيوب  
الدار أمان  
كنكان وكان  
خدلك مكان ٠٠ بين الملوك  
( زلموكة ) هات  
فيات وبيت من غير يا ريت ٠٠  
بيع العيال ٠٠  
أم العيال  
ماهو كل شئ ٠٠ فينا مباح  
٥٢

سأنت مزاد ..  
في الجامعة زاد ..  
قول البنات ..  
عرفي يا ريت  
من غير كسوف .. من غير جهاز  
يا بن الـ .. حلال  
لو جاني زيد ..  
بعدك نويت ..  
نفس الحوار  
إن جاز عليك ..  
والا ما جاز  
ما هو كل شيء .. فينا مباح  
أكبر مزاد ..  
الخلق خير  
عربان كثير  
صعلوك أمير  
يكفي الدينار .. والا الدولار

مليت فتات ..  
عمك جنيه  
واقتل ده ايه ..  
طب ليه كياس ..  
والبس حديد !!؟  
ما هي راس براس  
كله فـ مداس  
والاف مزاد  
يا خلق هووه ..  
ما توحده  
مليون مزاد  
ولا فيش مزاد ..  
يوم للجهد  
يا رب لطفك والسماح  
صار حلمنا ..  
عندك إلهي تضمنا  
ياتفكها لاجل النبي ..  
بطلوع صباح

## الإسماعيلية عروسة البلاد

الإسماعيلية درة فريدة      فوق صدر مصر العريضة  
أسوان والأقصر وجيزة      بيقولوا كلمة وجيزة

الإسماعيلية عروسة البلاد

ع الشط سابلة شعورها      وكفاحها زاین جبينها  
مدرسة لفن المقاومة      لو غاصب مس ترابها

تحول عظامه لرماد

قاومت سنين وما أنت      ما خارت يوم ولا كنت  
دبحت عداها وحرقت      مخازن عتاده وجعلت

النافي عيد للجهاد

مع الشرطة لبست دروعها      صدور رجالها وشبابها  
دبابه مدفع ما هابها      عصاية خنجر سلاحها

وايمانها برب العباد

مرت سنينها طويلة      من بعد يونية المدينة  
الهجرة كانت مريرة      وديارها صارت حزينة

صعبان عليها البعاد

في أكتوبر غنت جموعها      م الفرحة وولعت شموعها  
في صيامها كان والله عيدها      أدي مصر فردت قلوبها  
برغم أنف الموساد  
في قتالها عبرت جيوشها      الله أكبر زئيرها  
مسحت بارليف في سيرها      قهرت وبادت خصومها  
م الهجرة رجعوا الولاد  
رجعوا وشوقهم سابقهم      يحضن ويبوس ديارهم  
رموا جدار ويا جارهم      وبنوا وعلوا صروحهم  
جامعة منار للبلاد  
للجامعة مستشفى جامعة      أساتذة ودكاترة جهابذة  
ومدينة صناعية شاملة      وأراضي في الشرق جاهزة  
لزراعة وجني وحصاد  
ووادي تكنولوجيا ينادي      هيا هلموا ولادي  
تلفاز إذاعة لقتالي      والله وكبرت بلادي  
حماها رب العباد  
وحي زايد حكاية      ولاية تأخي ولاية  
وكل ولاية كآية      م الخضرة ويا البناية  
بفضل سواعد الولاد



جندول وفيروز ونورس      فنون للعمارة تُدرس  
الخضرة فيها كسندس      بتغني وكمآن بترقص  
ع السمسمية مع الصياد  
شطوطها على قد طولها      وتزيد حلاوة بجمالها  
تعالى مرة وزورها      هتلاقى كلامي ظلمها  
ما لهاش مثيل في البلاد  
الإسماعيلية درة فريدة      فوق صدر مصر العزيرة  
أسوان والأقصر وجيزة      بيقولوا كلمة وجيزة  
الإسماعيلية عروسة البلاد

## ودان من طين

---

بأنده عليك يا وفا	عامل ودان من طين
دخل قلوبنا الجفا	والغدر صار فدايين
كانت حياتنا هنا	والدنيا بيك بسايتين
إحنا اللي بعناك يا وفا	لاجل الغلابجنهين
فاكر زمان يا وفا	أنا كنت اشوفك فين
أيام ما كان العشا	بنجبيه سوا بقرشين
في قلب صاحبي وقلبي انا	مآخي ما بين الاتنين
بتعني مواويل فرحنا	في الشدة لنا معين
ساكن مع جيراننا هنا	عايشين رفاقة سنين
بنود بودادك بعضنا	ولهمي بإيدك شايلين
وف أهلي عايش وسطنا	ولجمعنا حارس أمين
دمك ببجري في دمننا	نورك في كل جبين
غبت وتنهنا هنا	جوّه حواراي العشاشين
سألنا قالوا اختفى	عليك جماعه نصايين

مكتوب صناعة الصين	إستوردوك قال يا وفا
والغدر منه اتنين	فتحننا لقينا الجفا
وجيراني مش سائلين	صاحبي فجاء اختفى
سبتنا إنت لمين	والأهل صاروا عدا
مين فينا هياكل مين	في زمن الديابة يا وفا
عامل ودان من طين	بأنده عليك يا وفا

## خلي اتكالك ع اللطيف

يا قلبي سامعك أنا  
من بدري شايفك هنا  
لا نخور حشاك الشتا  
إن كان ربيعك جفا  
بتنفخ نقول يا لطيف  
شايّل الهموم مقاطيف  
ولا انكويت من صيف  
ما تشكي يوم لخريف

\*\*

\*\*

من خل ليك مجروح  
كان لك صديق الروح  
بالسر عاد ببيوح  
يا قلبي منين ما تروح  
والجرح لسه ما طاب  
لبسته وفاك جلباب  
ولما فقرنا غاب  
مغشوشة وجوه الاصحاب

\*\*

\*\*

حتى الحبيب جه يوم  
شاهدين عليه القوم  
كان سهمه ليك مسموم  
وسؤال مالهمش لزوم  
على غيرنا لاف واندار  
باعنا برخيص الأسعار  
زي الزمان غدار  
مين فينا ليه اختار ؟

\*\*

\*\*

يا قلبي شيب الشعور  
والعزم مهما يخور  
وف ليلنا رمينا البذور  
يا قلبي خليك صبور  
زينة وعين الوقار  
هنفضل دايمما كبار  
ورويننا بعزم النهار  
حنفرح بجني الثمار  
\*\*

كل خوفك م المنية  
ده مكتوب ع البرية  
يا الله قوم فصل علي  
إرمني حمولك فوق شوية  
وبتراودك دايمما كطيف  
والا إيمانك صار ضعيف  
م الطهارة توب نضيف  
خلي اتكالك ع اللطيف  
\*\*

## الثالوث المدمر

خوفي عليك يا ابني	في قلبي ميت سكين
لا عارف لمين اشكي	والا أقول يا مين
يحوش البلا يا ابني	لاجل الوطن والدين
يكفي المرض صابني	من بلوة التدخين

\*\*\*

ثالوث هنا يا ابني	بجد والله خطير
خايف عليك منه	دا بداية التدمير
دا انت الأمل كله	لمصر في التعمير
حرص كثير منه	وإحسن التدبير

\*\*\*

الأولاه يا ابني	درب البطالة طويل
كل اللي فيه يا ابني	بكاس الفراغ مساطيل
حود بعيد عنه	واسلك طريق النيل
لسينا أو توشكي	واصمد وشد الحيل

كل الأمل يا ابني  
قدامك الأعمال  
حتى ولو عتال  
لما تكون شغال  
تتلمم الشارع  
في زراعة ومصانع  
أو للخضار بايع  
ما يوم تصير ضائع

\*\*\*

التانية يا ابني  
بتهد ما بتبني  
لو كان أنا بيدي  
صاحبها ما يبغي  
أفلام مخلة ودش  
وسيوف للحيا بتحش  
لاقفل قهاوي الدش  
في الدنيا غير القرش

\*\*\*

الثالثة يا ابني  
الشم والبانجو  
يدمن ويتمادي  
والصحة تتلاشى  
عين الخطر والموت  
خلوا الجدع هلفوت  
ما ينتبه للقتوت  
يسقط كورق التوت

\*\*\*

## خف حملك

ليه بتحرق ليه في دمك  
قوم واصرخ خف حملك  
ليه تسيب بنتك في غابة  
عن عينيك شيل السحابة  
فيه بلطجية فيه كباش  
ضمير فارقتا راح ماجاش  
أه يا خوفي يجينا بكرة  
ع اللي كان اليوم بيجري  
لا لمحضر قسم شرطة  
من هفي ونقع في ورطة  
لا لتاجر غاوي مكسب  
اللي يمضي بيته يخرب  
لا لتاجر باع ضميره  
باتجو بودة حشيش وغيره  
لا يا ابني حرام تضيع  
ع اللي جاري أكمنه غمك  
قول لكل الدنيا لا  
تنتهي ف بق الديابة  
قول لبنتك عيب ولا  
حياء خاصمنا ع الدشاش  
لكتر خوفنا نقولها لا  
نلقى كل حلوقنا مرة  
خرسنا حتى ما قلنا لا  
يتعمل كده بالأونطة  
ما حد حاسبه وقال له لا  
للشيكات دايمما بيكتب  
مراته تصرخ بعلي لا  
للشيطان ويضر غيره  
قول لكل شبابنا لا  
لاجل كيفك يوم تبيع



كل حاجة وشئ فظيع	تدبح أمك يا ابني لا
القلوب من الغلب تطفح	فيه جرايد الناس بتقضح
والطريق للفاحشة تقسح	حرام يا خلق وألف لا
فيه ملايكة يا ناس بتكتب	فيه بيوت كتير بتخرب
الرقابة ليه ما تشجب	نقول لهم يا صُفر لا
القدس محتاجة لتضامن	وقفه واحدة لكل كامن
وكوهين ماله نأمن	نقول له قدس العرب لا
العم سام في الخلق طايح	ما عايش هامة خلاص فضايح
طفل العراق قبل المدايح	قال له تاني يا عمو لا
ليه بتقتل أختي وأمي	ليه هتسفك تاني دمي
يا مين يشيل في الدنيا همي	ويقول لعمو حرام ولا ???

## النيل لما عبر

النيل لما عبر	تحت القنال غني
يا سينا قلبي انشطر	من كتر ما اتمنى
يزرع جبالك شجر	ينقشها بالحنة
يروى بوادي وحضر	تبقى كما الجنة

\*\*\*

يا سينا حسنك بهر	شعبك وزوارك
يحلو فيكي السهر	ما بتتطفى نارك
عاشق سماكي القمر	ده الفرع في ديارك
من يوم ما زال الخطر	باسود خدوا تارك

\*\*\*

يا سينا جانا الخبر	فين لما صدقنا
بارليف في لمحة اندثر	ولأرضنا سُدنا
نزلت دموعنا مطر	غنيا على عودنا
يا مصر جيشك عبر	يا سينا ليك عُدنا

\*\*\*

جايلك انا مشتاق      ودي أبوس رملك  
وامرح هنا وهناك      وارقص كما رقصك  
وارسم مع العشاق      لوحة لجمال قدك  
بننتك وفيها ملاك      فارس همام ابنك

\*\*\*

موجي لجا ليكي      يهدا هنا ويروق  
عاشق يدوب فيكي •      ياسينا يا ام الذوق  
سبحانه يعطيكى      وتعالى فوق الفوق  
نسهر لياليكي      نملاربوعك شوق

\*\*\*

١٦

## بدون سلاح

يا عاشقين الوطن  
لاجل الشباب ما رطن  
تايبه وصابه العطن  
كلت عزايه وو هن  
كيف يحرسك يا وطن  
قلبه الوطن باكي  
والغرب بيحاكي  
بصنوف المرض شاكي  
وشيطان في عقله سكن  
عضم مزينه بكافي

\*

قلب الشباب شفاف  
واللي عليه بيخاف  
صار الهباب اصناف  
ايكي وقول يا ناي  
قاتلة يداي ضناي  
والعقل ليه بيزين  
يكون له سند ومعين  
وانا اللي له بايعين  
العمر راح مش جاي  
يا ويلي يوم الدين

\*

يا عاشقين الوطن  
ان غار في داهية نتن  
لو نرخي ليهم رسن  
كونوا كما النبوت  
لاخر باراك طاغوت  
تحت الخفوف هنموت

جاري ف عروقهم صلف  
وعبورنا ليهم وصف  
\*

غل وخداع ما اتوصف  
في الحرب ورق التوت  
\*

يا عاشقين مصركم  
كوهين دخل وسطكم  
يا خلق حتى أرضكم  
هممه الكبير قتلكم  
تبكي عليكم قدسكم  
\*

حذاري من التطبيع  
يتاجر وإيه ببيع  
فيها الوباء بيشيع  
وبدون سلاح يحتلكم  
قدس العرب وتضيع  
\*

## فيران هايصة وناس لايسة

انجدونا من دي ورطة	زعقت أنا من عزم رأسي
الفيران هايصة وزايسة	ياللي عاليين الكراسي
في الميادين ع المحطة	في البيوت وسط الشوارع
*	*
بح صوتي بالأونطة	صرخت لما بقيت أهاتي
اللي صاحي لأي لهطة	اللي نايم ما هو داري
اللي إسمه مالي يافطة	اللي لاهي في الملاهي
*	*
بالدولار هيعبي شنطة	اللي حاسبها وجامع
قوة رادعة لأي قطة	الفيران فيها منافع
كلنا هنضيع أونطة	الطاعون ده سره باتع
*	*
يستريح من دي خطة	العدو من غير مدافع
خدلك يا شاعر قرن شطة	ويقول لنا بركة يا جامع

وطلعت أنا هايف ما راسي      إكمني يدنت في مالطة

\*

⋮

ليه أنا باوجع في راسي      لاجل فار ولا حتى قطة  
الطاعون مع إنه قاسي      بس أرحم من دي جلطة  
يوم تجيني م المآسي      اللي يدها لي فرطة

\*

\*

كل يوم يصرخ مداسي      نعلی داب حاسب يا أسطة  
عريان أنا وعاوز حماري      قال أشتري له كرافطه  
إكمنه شاف وهو ماشي      الفيران هايسة وزايطه

\*

\*

## يا أمل يا حنة مني

---

يا أمل يا ضي عيني      الليلة دي فرح عمري  
عشت لما شفتك إنتي      والعريس والكوشة تضوي

يا أمل يا حنة مني

الخوات والأخت جنبك      والخالات عمات وأمك  
والخيلان وأعمام وأهلك      والجيران جايين نزفك

يا أمل يا حنة مني

فرحانين واللييلة فرحك      والصعيد أسعد بضمك  
دا أسامة بقلبه حبك      نوق أدب والأصل زيك

يا أمل يا حنة مني

اللي قالوا إني بعثك      دول عوازل غاروا منك  
دا انا ابيع الدنيا لاجلك      وافندي بالعمر ضفرك

يا أمل يا حنة مني

دا النصيب من أمر ربك      والصعيد في أرضه نبتك  
صدقيني فخيره سعدك      واللي فيه ناسك وأهلك



يا أمل يا حنة مني  
ودي أعيش العمر جنبك      بادعي ربي يطول لأجلك  
حتى أشيل على كتفي ابنك      زي ما في البدء شلتك  
يا أمل يا حنة مني

## فارس أيامي

---

صدقني بادوب فيك خالص	وف قلبي باحسك جالس
في عيوني باشوفك فارس	فارس أيامي الجايه
بيقولوا بنات البندر	دول قشطة دايبه في سكر
باتجنن لما بافكر	ياخدوك مني با عيني
واتجنن اكثر واكثر	لو جمعة على تتأخر
وأريد قلبي يتكسر	ويشوفك قال في مرايه
يا حبيبي باحبك خالص	وأنا قلبي لك أهو خالص
صدقني أنا هازعل خالص	لو غبت الجمعة الجايه
صدقني بادوب فيك خالص	وف قلبي باحسك جالس
في عيوني باشوفك فارس	فارس أيامي الجايه

## عاشق أنا

---

عاشق أنا يا سوسنة	نظراية لعينيكي
عاشق ومشتاق لك أنا	عاشق بادوب فيكي
عاشق أنا بحر المدى	وشطوطه في عينيكي
أسبح ولو أغرق فدا	لمسايه لإيديكي
صار لهواك قلبي أسير	ياللي مالك أبدا نظير
حتى في دنيا الأساطير	ما في شبيه ليكي
عاشق أنا الرمش الكحيل	يضوي في ليلى القناديل
أغزل حروفه مواويل	أسهر وأغنيكي
انت دوا قلبي وطبيب	أنت المنى وأقرب قريب
ينبوع حنان ممزوج بطيب	أنهل وأغنيكي
عاشق أنا من كام سنة	باتمنى يوم قربك

مالي براح قلبي الهوى      نسقيه هنا ليكي  
ونطير سكارى في السحر      نمرح على ضهر القمر  
نرقص نغني يا قمر      عاشق بادوب فيكي

عاشق أنا يا سوسنة      نظرايه لعنيكي  
عاشق ومشتاق لك أنا      عاشق بادوب فيكي

## لا يا موج البحر لا لا

---

من علوك قلبي عانى ده حبيب الروح معانا	لا يا موج البحر لا لا هذي خليه مرة يفرح
جينا فوقه اليوم هنمرح لو هواه وافق هوانا	هذي خلي الشط يفرح جينا آه في البحر نسيح
هدهد الوجد اللي بينا لو في مركب أو سفينة	خلي سعيك هادي ليننا أوعى قلبي وقلبه تجرح
لو هتزعل منا بيّن والا بتهزر معانا	ودنا نشوفك حنين نهجر الشط ونروح
من علوك قلبي عانى ده حبيب الروح معانا	لا يا موج البحر لا لا هذي خليه مرة يفرح

## قائدة قناديلك

(إهداء للشاعر الكبير الأستاذ / عبد الرحمن الأبنودي )

---

م الفجر بنسنتى ظهورك غنانا الحلو ما هو شعورك  
اسفلت شار عنا ضوى بنورك على عوده دندن مواويلك

حراجي القط فرح خالص بعث في جوابه سلام خالص  
لسلامتك نجعنا صار هابص وتحية كبيرة بنهدي لك

سنابل قمحنا بتغنيك سواقي • نوارج بتهنيك  
النجع بحاله مشباق ليك ويطول العمر بندعي لك

بتقول الكلمة من فمك تفرح وتزغرت مصر امك  
من شوقها تجري وتضمك في ربوعها قائدة قناديلك

## الفهرس

رقم الصفحة	القصيدة
٣	سماح يا ليل
٧	أغنية شهيد
٩	مرت سنة يا سوسنة
١١	قلبي وصبار الأمل
١٣	اليمام ع النخل غنى
١٧	مين فينا أصدق
١٨	عيون أميرة
٢١	فوق شهر مارس
٢٥	سماح اليمامة
٢٧	الصدر العجيب
٣٠	أنا المفتون
٣٣	يفج الصباح
٢٦	انتظار السراب
٣٩	رسمة البستان

٤١	أنا مازلت باتعجب
٤٦	لما يبتسم الرغيف
٤٩	فكها لأجل النبي
٥٥	الإسماعيلية عروسة البلاد
٥٨	ودان من طين
٦٠	خلي اتكالك ع اللطيف
٦٢	الثالوث المدمر
٦٤	خف حمالك
٦٦	النيل لما عبر
٦٨	بدون سلاح
٧٠	فيران هايسة وناس لايسة
٧٢	يا أمل يا حنة مني
٧٤	فارس أيامي
٧٥	عاشق أنا
٧٧	لا يا موج البحر
٧٨	قائدة قناديلك

رقم الإيداع ٢٠٠١ / ١١٤٨٧

نبراس

للنشر والخدمات الإعلانية